

*De indisciplinatorum militum Paradeyseri in condescensionibus rapiendi licentia
praecavenda.*

Articulus 38.

Cum autem manifestum sit, praemissos Milites Rudolphi Paradeyser et extra Regnum collocatos esse et ad Confinia Carlostadiensia; ad avertendos hostiles impetus, frequentissime, per Partium illarum Regnicolarum Dominia excurrere, effraenataque militari in condescensionibus et rapinis uti licentia et nec eorundem Capitaneum multum revereri:

§. 1. Quo tantae eorundem exorbitantiae, effraenataque rapiendi licentia praescindatur et praecaveatur; medio eorundem Dominorum Commissariorum, Sacratissima sua Majestas benigne modum adinvenire dignetur, Status et Ordines supplicant.

Ne ob injurias Regnicolis Croatiae et Sclavoniae illatas, suae Majestati querelis molestiae causentur; Capitanei et Officiales Confiniarii Legibus Regni subesse debeant.

Articulus 39.

Et ne deinceps praemissi Regnorum Croatiae et Sclavoniae Regnicolae tantis et tam frequentibus afficiantur injuriis, Sacratissimamque suam Caesaream et Regiam Majestatem tanta earundem congerie molestare cogantur:

§. 1. Supplicant Status et Ordines, Majestati suae Sacratissimae; ut et dictos Capitaneos, sive Officiales Confiniarios, juxta Regni hujus Constitutiones, Legibus Regni subjicere; ac ejusmodi eorundem errores, comperta rei veritate, condigna animadversione juxta Anni 1618. Art. 33. et Anni 1622. Art. 49. emendari curare; et modum, quo ejusmodi querelae cessent, adinvenire clementer dignetur. *)

Subreptitia Valachorum privilegia cassantur.

Articulus 40.

Posteaquam Sacratissima sua Caesarea et Regia Majestas benigne sese resolvere dignata est, nunquam eandem illius intentionis fuisse, ut praescripti Valachi in praejudicium juris alieni privilegii aliquibus donati fuissent: **) Quinimo, ut medio Commissionis, Dominis Terrestribus, pro cujuscunque justa praetensione satisfactum fieret, benignissime intendisse; Eadem proinde eorundem Valachorum Privilegia, qualitercunque et quandocunque, sub quacunque verborum forma, emanata, cassantur et annihilantur. ***)

*) Urgetur; An. 1638. a. 22. et 51.

**) Confer; p. 1. t. 10. et seqq.

***) Similiter annihilantur; An. 1659. a. 90. An. 1681. a. 64. Confer. etiam; An. 1715. a. 113.